



KONY MOA MALO

ONDIKE GI
WATSON GOODMAN

Nono ok Ng'iew

KONY MOA MALO

KONY MOA MALO gin ndiko machalore mochoki kaachiel kowuok e Muma. Ayie ni buk maber molooyo kiloso kwome en mana Muma kende.

Wach Nyasaye a malo kendo adieri engi konyruok ni chunje makech gi riyo omako mar duaro wach makare. Kangato olokore moweyo richo, morwako Rwoth Yesu Kristo mondo odagi echunye, kendo oyie gi chunye duto kwom Ruoth Yesu Kristo kaka jawar. Ruoth biro fuenyorene kendo kelo morne owuon kod kue echuny jal moyieno. Nangeyo ma ehiga 1937, nyaka chakre kanyo pok lalruok miwuoroni okethore ekinda gi Ruoth. Akwayi mondo ichiwri ne kaka jawarni kendo Ruodhi kapok nitimo kamano chon.

Watson Goodman (1920-2002)

Text from the Bible in Luo by permission of the United Bible Societies, Africa Regional Centre, Nairobi, Kenya.

Jo Rumi 5.8

To Nyasaye onyisowa hera moherowago kama, ni Kristo notho-nwa, ka ne pod wan joricho.

Johana 3.16

“Nikech Nyasaye nohero piny ahinya, omiyo nochiwo Wuode ma miderma, mondo ng’a ma o-yie kuome kik lal, to obed gi ngi-ma mochwere.”

Johana 13.1

Ka Sawo mar Pasaka podi, Ye-su nong’eyo ni ndalone osechopo moago e piny ka, odhi ir Wuoro, kendo kosehero joge owuon man-nie piny, noherogi nyaka giko.

Fweny 1.5

Kendo moa kuom Yesu Kristo, janeno maradier, ma en Jal ma nokwongo a kuom jo motho, kendo jaloch mar ruodhi me piny. To kuom en moherowa, kendo nogonyowa e richowa gi rembe.

Yeremia 31.3

Jehova nonenore koda chon, mowacho, Ee, aseheri gi hera mochwere; e momiyo aseyuayo chunyi kang’wononi.

Johana 15.13

“Onge ng’ato man gi hera ma-duong’ moloyo ma, ni ng’ato o-weyo ngimane nikech osiepene.”

Mathayo 1.22, 23

Mago duto notimore mondo wach ochopi ma ne Ruoth oluwo gi dho janabi, ka owacho niya, “Nyako nobed gi ich, mi nonywol wuowi, To ginichak nyinge ni Emmanuel;” tiend nying’no en “Nyasaye ni kodwa”.

1 Timotheo 3.16

Adier, dini marwa oting’o wach maduong’ ahinya, ma wacho ni: “Kristo nofwenyore e ringruok, Roho nonyiso ni en kare, Malai-ka nonene; Ne oyal nyinge e kind ogendini, Ji noyie kuome e piny, Notere malo e duong’.”

Johana 14.9, 10

Yesu nowachone niya, “Asebedo kodu ndalo momedore, to ok ing’eya, Filipino? Ng’a mosenena, oseneno Wuoro; kendo iwacho nadi ni ‘Nyiswa Wuoro’? Ok iyie ka an e i Wuoro, kendo Wuoro ni e iya?”

Johana 1.1 gi 14

Kar chakruok Wach ne nitie, kendo Wach bende ne ni kod Nyasaye, kendo Wach ne en Nyasaye. . . Wach nodoko ringruok, mi nodak e dierwa; ne waneno duong’ne, duong’ka mar Wuowi ma miderma moa ka Wuoro, kopping’ gi ng’wono gi adiera.

Mathayo 8.29

Ne gikok niya, “Ilaro ang’o kuomwa, Wuod Nyasaye? Isebiro ka eri mondo isandwa, ka ndalo podi koso?”

Jo Kolosai 2.9

Nikech gigo duto ma miyo Nyasaye bedo Nyasaye odak e Kristo adier.

Isaiah 9.6

Ni mar osenyuolnwa nyathi, o-semiyowa wuowi; loch nobedi e luate; mi nyinge miluongego ni Hono, Jabura, Nyasaye ma Jateko, Wuonwa Ma Nyaka Chieng’, Ruodh Kuwe.

Mathayo 17.5

Ka ne ne pod owuoyo, bor polo marieny noimogi, kendo dwol noa e bor polono mowacho niya, “Jali en Wuoda mahero, chunya mor kode; winjeuru.”

Luka 1.35

Malaika nodwoke ni, “Roho Maler nobi kuomi, kendo teko mar Ng’a Mamalo Chutho noumi. E momiyo nyathi mibiro nywolo bende noluong ni maler, Wuod Nyasaye.”

1 Johana 4.15

Ng’a ma hulo ni Yesu en Wuod Nyasaye, Nyasaye osiko e iye, kendo en osiko e i Nyasaye.

Johana 13.13

“Un uluonga ni ‘Japuonj’, kendo ni, ‘Ruoth’; mano uwacho kare, nikech e an.”

Johana 8.23

Nokonigi niya, “Un jomwalo, to an ajamalo. Un jopinyni, to an ok ajapinyni.”

Johana 6.35

Yesu nowachonigi niya, “An e kuon mar ngima; ng’a ma obiro ira ok nowinj kech ngang’, kendo ng’a ma yie kuoma riyo ok noma-ke ngang’.”

Johana 10.7

E momiyo Yesu nowachonigi kendo niya, “Adier, adier, awachonu, an e dho ranga rombe.”

Johana 11.25

Yesu nowachone ni, “An e chier, kendo an e ngima. Ng’a ma yie kuoma, kata otho nodok mangima.”

Johana 8.58

Yesu nowachonigi ni, “Adier, adier, awachonu, ka ne Ibrahim pok obetie, antie.”

Johana 9.5

“Ka pod an e piny, an Ler mar piny.”

Johana 4.25, 26

Dhako nowachone niya, “Ang’eyo ni Mesia biro, (miluongo ni Kristo); jalo ka nobi nonyiswa weche duto.” Yesu nowachone ni, “An mawuoyo kodi, an e en.”

Mathayo 14.19-21

Ka nosechiko ji gibet piny e lum, nokawo makati abichgo gi rech ariyogo, nong'iyu polo, no-guedho, nong'ingo makati, momi-yo jopuonjre, to jopuonjre nomi-yo ji. Ji duto nochiemo moyieng'. Eka ne gikwanyo ng'injo mo-dong', mopong'o aditini apar ga-riyo. To jo machwo mochiemo ne gin kar gana abich, ma ok o-kwan mon gi wahia.

Luka 5.4-6

To ka notieko yalo, noko ni Simon niya, "Sia yie idhi e kut, ubol goku umak rech." Simon nowachone niya, "Ruoth, nende wachandore gotieno duto, mi ne

ok wamako gimoro, to kuom wa-chni nabol gogini." Ka ne giseti-mo kamano, ne gigeng'o rech mang'eny; mi gokgi ne dwaro chot.

Mathayo 20.30-34

Kendo muofini ariyo nobet piny e dir yo. Ka ne giwinjo ni Yesu kadho, ne gikok ka giwacho ni, "Ruoth, Wuod Daudi, ikechwa." To oganda nokwerogi, mondo gi-ling'; kata kamano ne gimedo kok, ka giwacho niya, "Ruoth, Wuod Daudi, ikechwa. . . Ru-oth, mondo wang'wa oyepi." To Yesu, kokechogi, nomulo wa-ng'gi; gikanyono wang'gi noyepo, eka ne giluwe.

Jo Hibrania 1.2

Nyasaye. . . to e giko mar ndalogi Wuowi osebedonwa wach Nyasaye wuon. En e ma Nyasaye nokete obed wuon gik moko duto, kendo en e ma gik moko duto nochue kuome.

Jo Rumi 14.9

Gi ma omiyo Kristo notho, mochier odoko mangima kendo, en ni mondo obed Ruodh jo motho gi jo mangima.

Johana 1.3

En e ma nomiyo gik moko duto ochue; kendo ka onge en, onge gimoro kata achiel ma nochue.

Jo Kolosai 1.16

Nimar en e ma nochueyo gik moko duto, e polo kendo e piny, gik mineno kod gik ma ok ne, kata gin kombe ruodhi, bet ruoth, joloch' kata joteko. Gik moko duto nochue kuom en, kendo nikech en.

1 Jo Korintho 1.9

Nyasaye en Jadier, ma noluongou e lalruok mar Wuode Yesu Kristo Ruodhwa.

Tich Joote 2.36

“Omiyo, dhood Israel mangima mondo ong'e chuth ni, Nyasaye oseketo Yesuni, ma nuguro, obed Ruoth kendo Kristo.”

Mathayo 25.32

“Kendo ogendini duto nochokre e nyime; eka nopoggi jogi kod jogi, kaka jakwath pogo rombe kod diek.”

Johana 5.22

“Kendo Wuoro ok ng’ad ni ng’-ato bura, to oseketo ng’ado bura e lwet Wuowi.”

Jo Rumi 14.10

In to, marang’o ing’ado bura ni owadu? Kata in, marang’o ichayo owadu? Nikech wan duto wabiwo chung’ nyim kom bura mar Nyasaye.

2 Timotheo 4.1

Achiki e nyim Nyasaye gi Kristo Yesu, ma biro ng’ado bura ni jo mangima gi jo motho, kendo achiki kuom birone gi pinyruodhe, ni.

Jo Rumi 2.16

Chieng’ ma Nyasaye ng’ado bura gi lwet Yesu Kristo kuom weche maling’ ling’ mag ji. Ayalo Wach Maberno kamano.

Tich Joote 10.42

“Kendo nochikowa ni mondo wayal ni ji, kendo wahul ni en e ma ne Nyasaye okete Jang’ad bura mag jo mangima gi jo motho.”

Johana 10.9

“An e dho rangach; ng’at ma donjo kuoma nokwo, bende non-donji, kendo nowuog oko, kendo nonwang’ chiemo.”

Johana 14.6

Yesu nowachone ni, “An e yo, kendo an e adiera, kendo an e ngima; ng’ato ok bi ka Wuoro ma ok okadho kuoma.”

Johana 8.24

“E momiyo awachonu niya, unutho e richou; nikech ka ok uyie ni an e en, to unutho e richou.”

Jo Hibrania 5.9

Kendo ka novertime obedo molony, nodoko jachiw warruok mo-

chwere ni jogo duto ma winjo wachne.

Tich Joote 4.12

“Kendo onge kwo kuom ng’ato moro; nikech onge nying’ moro machielo e bwo polo mochiw ni ji, monego wakwoe.”

Jo Hibrania 7.25

E momiyo, kinde duto onyalo reso jo ma kadho kuome ka gisudo ir Nyasaye, nikech ongima ndalo duto ni mondo okwanigi Nyasaye.

1 Jo Thessalonika 5.9

Nimar Nyasaye ne ok oketowa ni mirimbe, to noketowa ni mondo wayud warruok kuom Ruodhwa Yesu Kristo.

1 Jo Korintho 1.30

Kuom en, un e i Kristo Yesu, ma nodokonwa riekō moa ka Nyasaye, gi wach makare, gi pwo-dhruok, gi warruok.

Fweny 5.9

To ne giwero wer manyien niya, “In e miwinjori kawo kitabu-no, kendo gonyo kidogo, Nikech noyang’i, kendo rembi e ma ning’-iewogo ni Nyasaye ji Moa e oge-ndini duto, gi dhok duto, gi dhou-di duto gi pinje duto.”

Tito 2.14

En e ma nochiwore owuon ni-kech wan, mondo oreswa a e ke-

tho duto, kendo mondo opwo-dhwa, wabed ogandane moyiero, ma dwaro mondo otim timbe mabeyo.

Luka 19.10

“Nikech Wuod dhano obiro ni mondo odwar kendo ores jo mo-lal.”

Jo Kolosai 1.12-14

Gouru erokamano mamor ni Wuoro mosemiyo ubet jo mowi-njore chamo gikenī mage kaachiel gi jo maler e pinyruodh ler. No-resowa a e pinyruodh mudho ke-ndo noterowa e pinyruodh Wuode mohero, ma warowa, koweyonwa richowa.

Jo Efeso 1.7

Kuom en, wan gi warruok kuom rembe, ma en weyo kethowa, kaka mwandu mar ng'wone obet.

Jo Hibrania 9.14

To remb Kristo dilwok chunya maromo nadi? Kuom Roho Maler, Kristo nochiwore owuon ni Nyasaye kaka misango ma onge mbala, kogolowa e tich motho, mondo walam Nyasaye mangima.

Jo Rumi 5.9

Omiyo ka koro oseketwa kare kuom rembe, wanakwo a e mirima nikech en.

1 Johana 1.7

To kwawuotho e ler, kaka en e i ler, walalore ng'ato gi ng'ato, kendo remb Yesu Wuode pwo-dhowa kuom richo duto.

Mathayo 26.28

"Nikech ma e remba mar Muma, mochuer ni ji mang'eny mondo owenigi richogi."

1 Petro 1.18, 19

Kung'eyo ni nowarou kuom timu manono moa kuom kwereu. Nowarou, ok gi gik ma tow kaka fedha kata dhahabu, to gi remo ma nengone tek, kaka mar nyarombo ma onge mbala, kendo ma ok ochido, en remb Kristo.

Johana 6.28, 29

Eka ne giwachone ni, “Onego watim ang’o mondo wati tich Nyasaye?” Yesu nodwokogi ni, “Ma eri e tich ma Nyasaye dwa-ro, ni uyie kuom Jal ma nooro.”

Johana 20.31

To magi ondiki mondo uyie ni Yesu en Kristo, Wuod Nyasaye; kendo kuyie, mondo ubed gi ngi-ma e nyinge.

Jo Efeso 2.8, 9

Nimar oresou gi ng’wono kuom yie. To un ok e ma umiyo mano otimore; en mich Nyasaye. Ok oa kuom tim ma ng’ato timo, mondo kik ng’ato opakre.

Jo Rumi 5.1

E momiyo koseketwa kare kuom yie, wabeduru gi kuwe kod Nyasaye kuom Yesu Kristo Ruodhwa.

Jo Galatia 5.6

Nikech kuom Kristo Yesu, tero nyangu, kata ka ok oter nyangu, ok kony gimoro; to mana yie ma tiyo kuom hera.

Tich Joote 16.31

. . . “Yie kuom Ruoth Yesu, eka nikwo gi joodi.”

1 Johana 5.4

Nikech giduto ma Nyasaye onywolo loyo piny. To locho moseloyo piny e ma eri: yie marwa.

Yuagruok 3.22, 23

Kuom ng'wono mar Jehova ok notiekowa, ni kech ng'wonone ok nyal rumo. Ng'wonone ome-dore okiny kokiny, adierani duong'.

Zaburi 108.4

Nimar kechni duong' nyaka e polo, Kendo adierani ochopo nyaka boche polo.

Tito 3.5

Ok nikech timbe makare ma wan wawegi ne watimo, to nikech ong'won. Nowarowa kuom lwok ma nokelonwa nywol manyien, kendo ka Roho Maler nomiyowa bedo manyien.

Mika 7.18

Ere Nyasaye moro machal kodi, maweyo richo, kendo mayuoyo ni ji kethruok, mana jo modong' mag gikeni mare? ok okano mirimbe nyaka chieng', nikech omor kuom timo miwafu.

Zaburi 103.11

Nimar kaka polo bor gi piny ahinya, E kaka kechne duong' ni jo moluore.

Zaburi 103.17

To kech mar Jehova en ma nyaka nene kendo nyaka chieng' kuom jo moluore, Kendo timne matir nyaka nyikwagi.

Mathayo 11.28

“Biuru ira, un duto mujony kendo mugangoru mapek, to anamiu yueyo.”

Isaiah 1.18

Jehova owacho, Biuru koro, wapor wach kaachiel; kata richou obet makwar ahinya, ginidok matar kaka theluji; kata gin makwar ka remo, ginibed kaka yie rombe marachar.

Isaiah 55.1

Owetewa, ng'ato ka ng'ato ma riyo oloyo, biuru, pi ni ka, jalo bende maonge gi senti; biuru, ng'iewuru, chiemuru; ee, biuru, ng'iewuru divai gi chak maonge senti, maonge nengo.

Fweny 22.17

To Roho gi Miahwa wacho ni, “Bi!” Kendo ng'a mowinjo, mondo owach ni, “Bi!” Kendo ng'a ma riyo omako, obi, mondo oyud pi mar ngima nono.

Chakruok 7.1

Kendo Jehova nowacho ni Noa niya, Biuru, in kod joodi duto udonj e yie; nikech in e masene-no kidimbori e nyima kuom tie-ng'ni.

Johana 7.37

To chieng' giko mar Sawo, ma e chieng' maduong' mar Sawo, Yesu nochung', nokok kowacho niya, “Ng'ato ma riyo omako, ber mondo obi ira, omodhi.”

Jo Filipi 2.15

Mondo ubed nyithind Nyasaye ma onge bura kata wuond, kuonge mbala e kind tieng' mobam kendo mokethore; kendo rienyuru e kindgi kaka sulue rieny e polo.

Johana 1.12

To giduto ma norwake, nomi-yogi teko mondo gibed nyithind Nyasaye, e jogo ma yie kuom nyinge.

2 Jo Korintho 6.17, 18

Omiyo Ruoth owacho niya, "Auru kuomgi, kendo walreuru, Kik umul gi mochido; Mi narwaku, Nabadnu Wuoro, Kendo u-

nubed yawuota gi nyiga, Ruoth manyalo duto owacho."

1 Johana 3.10

Nyithind Nyasaye kod nyithind Satan ng'ere kuom wachni: ng'a ma ok tim makare ok en mar Nyasaye, kata ng'a ma ok her owadgi.

Jo Rumi 8.14, 15

Ji duto ma Roho mar Nyasaye otelonigi, gin yawuot Nyasaye. Nikech ne ok uyudo chuny mar bet misumba kendo, mondo omiu luoro, to nuyudo chuny mar bet yawuot wuon dala, momiyo yawwak ni, "Abba! Wuora!"

Ngeche 23.31, 32

Kik ine divai ma rangi makwar; Kobedo makwar ei kiko-mbe; Kimadhe, to yom. Achien okayo kaka thuol; Okayo kaka u.

Isaiah 5.11

Yaye, jogo mamondo gokiny, mondo gidhi ka kong'o; mabudho nyaka odiewuor, nyaka divai omerogi.

Jo Galatia 5.19-21

Tim mag ringruok nenore rati-ro, e magi: terruok, dhoch, tim ma ok ler, anjawo, lamo nyiseche manono, timbe jwok, sigu, dhawo, nyiego, mirima, ich lit, pogru-

ok, kanyakla, gombo, mer, tugo e thum, gi moko ma kamagi. Anyi-sou, kaka nanyisou chon ni, jogo ma timo magi ok nocham gikeni mag pinyruodh Nyasaye.

Ngeche 20.1

Divai okelo achaye, kong'o okelo dhau; Ng'a matagore godo oonge gi rieko.

Jo Rumi 13.13, 14

Wawuothuru kare abidha, kaka jo ma wuotho e ler godiechieng'; waweuuru tugo e thum gi mer, terruok gi anjawo, dhawo gi ich lit. To rwakreuru gi Ruoth Yesu Kristo, kendo kik umi ringruok thuolo kuom timo gombone.

Mathayo 22.37, 38

To nokone ni, “Her Ruoth Nya-sachi gi iyi duto, kendo gi chunyi duto, kendo gi riekoni duto. Ma e chik maduong’ kendo mokwongo.”

Mariko 10.17-22

To ka nonwang’o odhi e yo, ng’ato moro noringo ire, mogoyo chonge piny nyime, mopenje ni, “Japuonj maber, atim ang’o mondo acham giken ni ma en ngima mochwere?” Yesu nokone niya, “Ang’o momiyo iluonga ni maber? Onge ng’a maber, mak mana Nyasaye kende. Ing’eyo chik: ‘Kik ineki; kik iterri; kik ikwel; kik ihang; kik igang wach; mi wuoru

gi meru duong’.” To en nowachone niya, “Japuonj, magi duto asemako nyaka aa rawera.” Eka Yesu kong’iye nohere, moluwone niya, “Wach achiel oremi: dhi, ilok gik ma in go duto, imi jo modhier, eka nibed gi mwandu e pollo; to bang’e bi, iluwa.” To en nomieno wang’e kuom wachno, nodhi ka litne, nikech ne en ng’ato ma ramoko.

Jo Hibrania 3.13

To moloyo jiwreuru ng’ato gi ng’ato ndalo duto, ka pod ndaloni iluongo ni “Tinende”, mondo kik wuond mar richo omi ng’ato moro kuomu obed gi chuny mattek ta.

Jo Galatia 6.3

Ka ng'ato galo ni en gimoro, ka ok en gimoro, owuondore owuon.

1 Johana 3.7, 8

Nyithindo, kik ng'ato owuondu. Ng'a ma timo makare obedo kare, kaka en bende obedo kare; ng'a ma timo richo en mar Satan, nikech Satan timo richo nyaka a chakruok.

Jakobo 1.22

To beduru jo ma winjo wach kendo timo, ok jo ma winjo kende, kuwuondoru uwegi.

Jo Efeso 5.6

Kik ng'ato owuondu gi weche manono; mago e weche ma kelo

mirimb Nyasaye kuom jo ma dagi winjo wach.

1 Jo Korintho 6.9, 10

Koso ok ung'eyo ni jo ma ok kare ok nocham giken ni mag pi-nyruodh Nyasaye? Kik uwuondru; jochode, kata jolam nyiseche manono, kata jo ma terore, kata chwo ma terore gi chwo, kata jokuo, kata jogombo, kata jomer, kata joyenyo, kata jomecho, ok ginicham giken ni mag pi-nyruodh Nyasaye.

Jo Galatia 6.7

Kik uwuondru, ok inyal wuondo Nyasaye. Gi ma ng'ato chwoyo, gino bende e ma noka.

Jo Rumi 8.6, 7

Paro weche mag ringruok en tho; to paro wecho mag Roho en ngima kod kuwe. Nikech ng'a-to ma paro weche mag ringuok mon gi Nyasaye, nimar ok owinj Chik Nyasaye, kendo ok onyal winje.

Jo Rumi 5.12

Kaka richo nobiro e piny kuom ng'at achiel, kendo tho nobiro e piny kuom richo, kamano bende tho nobiro ni ji duto, nikech ji duto ne otimo richo.

Ngeche 11.19

Ng'at matimo tim makare gi kinda noyud ngima; To ng'at maluwo richo noyud thone owuon.

Luka 15.32

To owinjore wamor kendo wail, nikech owaduni yandi otho, to koro ongima; yandi olal, to koro onwang'e.

Jakobo 1.15

Eka gombo kosemako ich onywolo richo, to richo kosedongo ogik, onywolo tho.

Ezekiel 18.20

Ng'a maketho enotho: buch wuon wuowi ok noriw wuode bende, kata buch wuod ng'ato riwo wuon mare; nokwan ng'ato ng'at makare kuom timne makare ma engo, kendo nokwan ng'ato ng'a marach kuom timne maricho ma engo.

Johana 5.21

“Nikech kaka Wuoro chiero jo motho, kendo omiyogi ngima, e kaka Wuowi bende timo; jogo modwaro miyo ngima, omiyogi.”

Luka 7.14, 15

Nosudo machiegni, momulo thigo; to jo ma noting’e nochung’. Nowacho niya, “Wuowi, awachoni, chungi.” Ng’a motho noa malo, mochako wuoyo.

Johana 11.43, 44

Ka nosewacho wechego, nokok gi dwol maduong’ ni, “Lazaro, wuog oko.” Jal mothono nowuok, kotue nanga mar liel e tiendene

kod luetene; kendo wang’e bende onal gi kitamba. Yesu nowachonigi ni, “Gonyneururu nanga, odhi.”

Johana 10.17, 18

“Wuoro ohera nikech aweyo ngimana mondo akawe kendo. Onge ng’ato ma gole kuoma, to an awuon aweye. An gi teko mar weye, kendo an gi teko mar kawekendo. Chikni nanwang’o kuom Wuora.”

Fweny 1.18

“Kendo an e Jal mangima. Ne atho, to koro angima nyaka chieng’. An gi rayaw mar tho, kod mar Kar Jo Motho.”

Rapar mar Chik 5.7-21

Kik ubed gi nyiseche moko nyima.

Kik ilosni kido moro, maket gi gimoro ma ni e polo malo, kata ma ni e piny mwalo, kata ma ni e pi tiend piny: kik ikulorinigi, kata tiyonigi. . .

Kik iwach nying Jehova Nyasachi kayiem nono: to Jehova ok anoyie ni ng'ato mawacho nyinge kayiem nono, koler e bura.

Kung chieng' sabato, irite maller, kaka Jehova Nyasachi nochikoi. Ti tich ndalo auchiel, tim tichni duto: to ndalo mar abiriyo ni sabato mar Jehova Nyasachi.

Luor wuoru gi meru, kaka Jehova Nyasachi nochikoi: mondo ndaloni odok mathoth, kendo mondo obedni maber, e piny ma Jehova Nyasachi omiyoi.

Kik inegi.

Bende kik iterori.

Bende kik ikwal.

Bende kik iriambi ni ng'ato.

Bende kik igomb chi ng'ato; kata kik igomb od ng'ato, kata puothe, kata jatichne mawuoi, kata jatichne manyako, ruadhe, kata kanje, kata gimoro mar ng'ato.

Tich Joote 17.27

“Ne dwarore mondo gimany Nyasaye ni miti di girom kode kendo nwang’e, to adier ok obor kodwa ng’ato ka ng’ato.”

Zaburi 139.8 gi 12

Kaidho malo e polo, in kanyo; Kapedho kar nindona e Sheol, ne, in kanyo. . . To kata mudho ok yimni gimoro, To otieno rieny kaka odiechieng’: Mudho gi ler bedoni machalore.

Luka 8.17

“Nikech onge gi mipando ma ok nofwenyre; onge gi maling’ling’ ma ok nong’ere, kendo ok noelre.”

Ayub 34.21, 22

Ni mar wang’e ong’iyo yore mag dhano, Oneno wuodhe duto. Onge kar mudho kata kar tho, Ka ma jo matimo mamono di-pondie.

Ngeche 15.3

Wang’ Jehova ni kuonde duto; Morango pile jo maricho kod jo mabeyo.

Yeremia 23.24

Dhano nyalo pondo ka moge-ng’ore ni kik anene koso? Jehova owacho. Ok antie kuonde duto me i polo kendo me i piny? Jehova owacho.

Zaburi 9.17

Jo maricho ginidogi e Sheol,
Ee, ogendini duto ma wigi owil
gi Nyasaye.

Mathayo 13.41, 42

“Wuod dhano noor malaikane,
mi ginichok gik moko duto ma
kelo chwanyruok, kod ji duto ma
timo maricho, kendo ginigolgi
oko e pinyruodhe, mi giniwitgi e
mach maduon’ maliet mager; ka-
nyo ywagruok nobedie, kod muo-
do lak.”

Fweny 20.15

To ng’at ma nyinge ok nonwa-
ng’ kondik e kitap ngima nowit
e ataro mar mach.

Mathayo 18.8

“Ka lweti kata tiendi chwanyi,
ng’ade oko, iwite oa kuomi; berni
donjo e ngima king’ol kata ki-
puth, molooyo witi e mach ma
nyaka chieng’ ka in gi lwedo ari-
yo kata tielo ariyo.”

Mathayo 25.46

“To jogi noa, nodhi e bura mo-
chwere; to jo makare nodhi e
ngima mochwere.”

2 Petro 3.7

To kuom wach nogo mar Nya-
saye, polo ma kawuono kod piny
ma kawuono okan ni mach, ko-
ketgi ni cheing’ bura kod tho mar
jo ma ok luor Nyasaye.

1 Johana 4.17

Kuom mano hera olony kare kuomwa, mondo wabed gi chir chieng' bura; nikech e pinyni wabet kaka en obet.

2 Jo Korintho 5.10

Nikech wan duto onego ngima-wa elre e lela nyim kom buch Kristo, mondo ng'ato ka ng'ato oyud pok ma romo kod gi ma no-timo ka ne pod en e ringruok, kata ne tichne ber kata rach.

Tich Joote 17.31

"Nikech oseketo chieng' ma jalo moseyiero nong'adie ni piny bura makare; kendo osemiyo ji duto singo, kochiere a kuom jo motho."

Jo Hibrania 9.27

Kaka ji duto oketi ni mondo githo mana dichiel, to bang' mano bura nitie.

2 Petro 2.9

Ruoth ong'eyo reso e temruok jo ma oluore, kendo keto jo ma ok kare e kum mar tuech nyaka chop chieng'no mar bura.

Fweny 20.12

To naneno jo motho, jo mado-ngo gi jo matindo, kochung' e nyim kom duong'; kendo noel kitepe. Kitabu machielo bende noel, ma en kitap ngima. Jo motho nong'adnigi bura gi gik ma ne gitimo, mondiki e kitepego.

Jo Rumi 9.16

E momiyo ok en wach gi ma ng'ato dwaro kata timo, to en wach Nyasaye ma kecho.

Jo Rumi 5.15

Mich Nyasaye ok obet kaka richo. Nikech adier ji mang'eny ne otho kuom richo mar ng'at achiel; to ng'wono mar Nyasaye, kaachiel gi mich moa kuom ng'wono mar ng'at achiel, Yesu Kristo, nomedore ahinya moloyo ni ji mang'eny.

2 Jo Korintho 9.15

Erokamano ni Nyasaye kuom mich mare modhiero wacho!

2 Jo Korintho 8.9

Ung'eyo ng'wono mar Ruodhwa Yesu Kristo, ni kata ne en gi mwandu, to nodoko jachan nikech un, mondo kuom chan mare udok jomwandu.

Tich Joote 4.33

Kendo joote notimo neno gi teko maduong' kuom chier mar Ruoth Yesu; kendo gueth maduong' nobet kuomgi duto.

1 Petro 5.5

Kendo uduto rwakuru law muolo, kuwinjoru ng'ato gi ng'ato; nikech Nyasaye tamo josunga, to omiyo jo mamuol ng'wono.

Tich Joote 3.19

“E momiyo lokuru chunyu, kendo lokreuru ni Nyasaye, mondo richou owany.”

2 Jo Korintho 7.10

Ywak mobet kaka Nyasaye dwaro, kelo loko chuny ma cho-po e warruok ma onge ywago ang’e; to ywak mar piny kelo tho.

Tich Joote 17.30

“To ndalogo mag kiya, Nyasaye noweyo; to koro ochiko ji duto kuonde duto ni mondo gilok chunyi.”

Luka 13.3

“Akonu ni, ooyo; to ka ok ulok chunyu, un duto, unulal kamano.”

Mathayo 3.2

Nowacho niya, “Lokuru chunyu, nikech pinyruodh polo chiegni.”

Tich Joote 2.38

Petro nokonigi niya, “Lokuru chunyu, kendo obatisu uduto e nying Yesu Kristo, mondo richou owenu; eka ununwang’ chiwo ma en Roho Maler.”

Ezekiel 18.31

Weuru tim kwer duto ma ungo, ma yande utimo; lokreuru ubedi gi tim manyien, kit chunyu bende obedi manyien: uyie tho nang’o, A dho od Israel?

Tich Joote 5.31

“En e ma Nyasaye noting’e malo gi lwete korachwich mondo obed Jatelo gi Jawar, mondo omi jo Israel lokruok mar chuny, kendo owenigi richogi.”

Mathayo 6.14

“Nikech kuweyo ni ji richogi, un bende Wuonu me polo nowenu.”

Fweny 3.20

“Ne! Achung’ e dho ot, kendo adwong’o. Ka ng’ato owinjo dwo-nda, mi oyawo dho ot, anadonj ire, kendo anachiem kode, to en bende nochiem koda.”

Isaiah 55.7

Ng’at marach mondo owe yore, ng’at ma ok kare bende owe parone; oduog ir Jehova, mi nokeche; ir Nyasachwa, ni kech nowene richone duto.

Ezekiel 18.21

To ka dipo ng’a marach oloko-re moweyo richone duto mosetimo, korito chikna, koluwo chik, kotimo gi mowinjore, nobedi mangima adier, ok enotho.

Mariko 2.5

To Yesu koneno yiegi, nowa-cho ni jaathany niya, “Wuoda, richoni oweni.”

Jo Efeso 5.11

Kik ulalru gi tim mudho ma onge ohala, to molooyo umi kitgi ong'ere ratiro.

1 Johana 2.15, 16

Kik uher piny, kata gik manie piny. Ka ng'ato ohero piny, hera mar Wuoro ok ni e iye. Nikech gik moko duto manie piny, gombo mar ringruok, gi gombo mar wang', gi sunga mar ngima, ok gia kuom Wuoro, to gin mag pinyni.

Isaiah 1.16

Luokreuru, beduru mapoth; weuru timo gik maricho e nyima; weuru tim morochore.

Jakobo 4.4

Un chwo gi mon ma terore, ok ung'eyo koso, ni ka umako osiep gi piny, utimo sigu gi Nyasaye? Ng'ato ka ng'ato ma dwaro bedo osiep piny otimore wasik Nyasaye.

Tito 2.11, 12

Nikech ng'wono mar Nyasaye, ma kelo warruok ni ji duto, osefwenyore. Opuonjowa mondo wadagi richo gi gombo mag piny, wawuoth kwaritore, kendo wabed makare, kwaluoro Nyasaye e piny mar ndaloni.

Jo Kolosai 3.2

Paruru gik man malo, ok gik ma ni e piny.

1 Johana 2.29

Kung'eyo ni en ng'at makare, ng'euru bende ni ji duto ma timo makare en e monywologi.

Ezekiel 36.26

Anamiyu chuny manyien, kendo anaket roho manyien e chunyu; kendo anagol kuomu chuny marach matek ka kidi, anamiyu chuny mayom mar dhano maber.

Johana 3.3

Yesu nodwoke niya, "Adier, adier, awachoni, ka ok onywol ng'ato nywol manyien, ok onyal ne-no pinyruodh Nyasaye."

2 Jo Korintho 5.17

E momiyo, ka ng'ato obedo e i Kristo, ochueye ng'a manyien;

gik moko machon osekadho, neuru, gik moko duto obet manyien.

1 Petro 1.23

Nonywolu nywol manyien kuom wach mangima kendo ma siko mar Nyasaye, ok kod kodhi ma tow, to ma ok tow.

1 Johana 5.18

Wang'eyo ni ng'ato ka ng'ato ma Nyasaye onywolo ok tim richo, to Jal ma Nyasaye nonywolo e ma ritogo, kendo Ng'a Marachno ok mule.

1 Jo Korintho 6.11

Jo moko kuomu ne uchalo ka jogi, to nolwokou, nopwodhou, noketou kare e nying Ruoth Yesu, kuom Roho mar Nyasachwa.

Jo Efeso 2.1 gi 6

Un uwegi ne un jo motho nikech kethou gi richou. . . Nochierowa kaachiel kode, kendo nomi-yowa bedo kaachiel kode e polo e Kristo Yesu.

Jo Galatia 5.24

Kendo jogo mag Kristo Yesu oseguro ringruok kod herane marach gi gombone.

Jo Kolosai 2.13

To kata ka ne un jo motho nikech kethou, kendo nikech ne ok oteru nyangu e ringreu, Nyasaye nomiyo udoko mangima kaachiel kod Kristo, ka noweyonwa kethowa duto.

Jo Kolosai 3.1

To ka osechieru kaachiel gi Kristo, dwaruru gik man malo, ka ma Kristo obet e bad Nyasaye korachwich.

Jo Rumi 6.2 gi 11

Wan jogo mosetho ni richo, pod wanyalo nadi dak e richo? . . . Kamano un bende, kwanreuru ka un jo mosetho ni richo, to ungima ni Nyasaye kuom Kristo Yesu.

1 Petro 2.24

En owuon noting'o richowa e ringre e yath, mondo watho ni richo, eka wabed mangima ni wach makare; kuom riemo mar chwatne osechangu.

Johana 17.3

“Mani e ngima mochwere, ni ging’eyi, in Nyasaye makende maradier, kod jal ma nioro, Yesu Kristo.”

Jo Galatia 6.8

Nikech en ma chuoyo kuom ringre owuon, noka top kuom ringuok; to en ma chuoyo kuom Roho, noka ngima mochwere kuom Roho.

Johana 3.36

“Ng’a ma oyie kuom Wuowi en gi ngima ma nyaka chieng’; to ng’a ma ok winj Wuowi ok none ngima, to mirimb Nyasaye osiko kuome.”

Johana 3.14, 15

“Kendo kaka Musa nochungo thuol e thim, e kaka Wuod dhano bende onego ochungi; mondo ng’a ma yie kuome obed gi ngima mochwere.”

Johana 5.24

“Adier, adier, awachonu niya, ng’a ma winjo wachna, kendo yie kuom Jal ma noora, en gi ngima mochwere, kendo ok odhi e bura, to osea e tho, kendo osedonjo e ngima.”

Jo Rumi 6.23

Nikech misach richo en tho; to mich Nyasaye en ngima mochwere e Yesu Kristo Ruodhwa.

Johana 14.21

“Ng’at man gi chikna, kendo o-mako, en e mohera; to ng’at mohera, Wuora bende nohere, an bende nahere, kendo nafwenyane.”

Jo Galatia 4.6

Nikech un yawuowi, Nyasaye nooro Roho mar Wuode e chunywa, ma ywak ni, “Abba! Wuora!”

1 Johana 3.18, 19

Nyithinda, kik waher gi wach, kata gi lep; to gi tich, kendo gi adiera. Mano e mwang’eyogo ni wan mag adiera; kendo wanaho chunywa e nyime.

Jo Rumi 8.16

Roho owuon oriwore kaachiel kod chunywa kodoko janeno ni wan nyithind Nyasaye.

Isaiah 32.17

To tich tim makare nokel kuwe, kendo tim makare nomi chuny ji bedo gi kuwe kod geno ndalo duto.

I Johana 3.24

Ng’a ma mako chikne, siko e iye, kendo en bende osiko e iye. Ma e mwang’eyogo ni osiko e iwa. Nikech Roho ma nomiyowa.

1 Johana 4.13

Ma e mwang’eyogo ni wasiko e iye, kendo osiko e iwa, nikech osemiyowa kuom Roho mare.

Jo Efeso 3.17

Mondo Kristo odag e chunyu kuom yie; mondo, kumoko kendo kuchungo e hera.

Johana 17.13

“To an koro abiro iri; kendo wehegi awacho e piny, mondo gibed gi morna, kendo morna oromgi chuth.”

Isaiah 12.3

E momiyo unuumb pi gi mor e sokini mag resruok.

Zaburi 16.11

Ininyisa wang' yor ngima: E nyimi nitie yilo maduon' chutho; E lweti marachwich nitie gik ma miyo chuny mor nyaka chieng'.

Jo Rumi 14.17

Nikech pinyruodh Nyasaye ok en chiemo kata metho, to en tim makare gi kuwe gi mor e Roho Maler.

Johana 15.11

“Wehegi awachonu mondo morna obedi e iu, kendo mondo moru orom chuth.”

Jo Galatia 2.20

Nogura kaachiel gi Kristo; ok angima koro, to Kristo e ma ngima e iya. Ngimano ma koro an godo e ringruok, angima kuom yie man kuom Wuod Nyasaye ma nohera, kendo nochiworena.

Jo Rumi 6.16

Donge ung'eyo ni, ka uchiworu ni ng'ato kaka wasumbini mondo uwinj wachne, un wasumb ng'atno muwinjo wachne; kata wasumb richo ma terou e tho, kata wasumb winjo wach ma ketou kare?

1 Samuel 12.15

To ka ok uwinjo dwond Jehova, to utimo tama kuom chik mar Jehova, eka luet Jehova nobed mapek kuomu, kaka nobedo kuom kwereu.

2 Jo Thessalonika 1.7-9

To oor resruok ni un muneno sandruok, kendo ni wan bende.

Mano notimre ka Ruoth Yesu ofwenyore, koa e polo gi malaika mage man gi teko, e mach ma liel. Nochul kuor ni jo ma dagi ng'eyo Nyasaye, kendo ni jo ma ok oyie winjo Wach Maber mar Ruodhwa Yesu. Giniyud kum mar keth ma nyaka chieng', kirie-mbogi gia e wang' Ruoth, kendo e duong' mar tekone.

Rapar mar Chik 11.26-28

Neuru, tinendeni aketo e nyimu gweth kod kuong'; gweth, ka uwinjo chik mar Jehova Nyasachu, ma achikoue tinendeni: kendo kuong' ka ok uwinjo chik mar Jehova Nyasachu. . . .

Mathayo 10.32, 33

“Omiyo ng’ato ka ng’ato ma nohul nyinga e nyim ji, an bende anahul nyinge e nyim Wuora me polo. To ng’at ma enokweda e nyim ji, an bende anakwede e nyim Wuora me polo.”

Jo Rumi 10.9, 10

Kihulo gi dhogi ni Yesu en Ruoth, kendo kiyie e chunyi ni Nyasaye nochiere a kuom jo motho, noresi. Nikech ng’ato oyie gi chunye mi odoko makare; kendo ohulo gi dhoge, mi irese.

Luka 9.26

“Nimar ng’ato ma wiye okuot koda, kendo kod wechena, Wuod

dhano bende wiye nokuodi kod ng’atno, ka nobi e duong’ne maler, kendo e duong’ mar Wuoro, kendo mar malaika mage maler.”

1 Johana 2.23

Ng’a ma kwero Wuowi, ok en gi Wuoro: ng’a ma hulo Wuowi, en gi Wuoro bende.

Jo Filipi 2.11

Kendo lep ka lep ohul ni Yesu Kristo en Ruoth, mondo Nyasaye Wuoro omi duong’.

1 Johana 4.2

Ma e mung’eyogo Roho mar Nyasaye: roho ka roho ma hulo ni Yesu en Kristo mosebiro e ringruok, en mar Nyasaye.

2 Jo Korintho 2.11

Mondo Satan kik lowa; nimar wang'eyo riekone.

Mathayo 4.1 gi 10, 11

Eka Roho notelo ni Yesu nyaka e thim mondo Satan oteme... To Yesu nowachone niya, "Aye, Satan; nikech nondiki niya, 'Ruoth Nyasachi ema nilam, kendo en kende ema nitine.'" Eka Satan noweye, to malaika moko nobiro, kendo notiyone.

2 Jo Thessalonika 2.9

To biro mar dhano ma chayo chik en tich Satan, kendo nobed kod teko duto, gi ranyisi, gi honi ni mag miriasia.

Tich Joote 26.18

Mondo iyaw wang'gi gia e mudho gidhi e ler, kendo gia e teko Satan gidhi ir Nyasaye, mondo ka giyie kuoma to owenigi richogi, kendo giyud giken i kaachiel gi jo mosedoko jo maler.

1 Petro 5.8

Ritreuru, kiuru; nikech jasiku, Satan, bayo ka sibuor ma goyo asumbi, kodwaro ng'a ma dongam.

Jo Efeso 6.11

Rwakuru gi lwenje duto mag Nyasaye, mondo unyal tamo wuond mariek mag Satan.

2 Jo Korintho 10.4

Nikech gi lwenje mwakedogo ok gin mag ringruok, to kuom Nyasaye gin gi teko mar muko ut lweny.

2 Jo Thessalonika 2.8

Eka dhano ma chayo chik no-fwenyre, kendo Ruoth Yesu no-nege gi muya moa e dhoge, ko-tieke gi fwenyruok mar birone.

Jakobo 4.7, 8

E momiyo winjuru Nyasaye; to tamuru Satan, mi noringu. Suduru ir Nyasaye, to nosud iru.

Jo Hibrania 2.14

E momiyo, kaka nyithindogo ni gi ringruok mar dhano, e kaka

Yesu bende nokawo ringruok mar dhano. Notimo kamano mondo kuom thone oketh loch mar jal man gi teko mar tho, tiende ni Satan.

Jo Rumi 8.35 gi 37

Ng'ano ma nopogwa gi hera mar Kristo? Masira, koso chandruok, sand, kech, duk, gi marach, ligangla? . . . Ooyo! E mago duto waloyo chuth kuom en ma noherowa.

1 Johana 3.8

Nga' ma timo richo en mar Satan, nikech Satan timo richo nyaka a chakruok. Wuod Nyasaye nofwenyore nikech wachni, mondo oketh tich Satan.

Johana 21.16

Nopenje kendo marariyo ni,
“Simon, wuod Johana, ihera?”
Nodwoke niya, “Ee, Ruoth; in
ing’eyo ni aheri.” Nowachone ni,
“Kwa romba.”

1 Johana 4.20

Ka ng’ato owacho ni, “Ahero
Nyasaye,” to osin gi owadgi, oja-
miriambo; nikech ng’a ma ok her
owadgi moseneno, ok nyal hero
Nyasaye ma pok oneno.

Jo Galatia 5.22, 23

To nyak mar Roho en hera,
mor, kuwe, horuok, miwafu, ng’-
wono, bedo adiera, muolo, ri-
truok; onge chik ma kwedo magi.

1 Jo Korintho 13.1

Ka awuoyo gi dhok mag ji ka-
ta mag malaika, to aonge hera,
abedo ka okot ma ywak, kata o-
lang’ migoyo.

1 Johana 3.14

Wang’eyo ni wasea e tho, wa-
sedonjo e ngima, nikech wahero
owete. Ng’a ma onge hera osiko
e tho.

Johana 13.35

“Ma eri e ma nomi ji duto
ong’e ni un jopuonjrena, ka un
uheroru ng’ato gi ng’ato.”

1 Johana 5.3

Nimar hero Nyasaye en mako
chikne, to chikne ok tek.

Tich Joote 10.39-41

“Kendo wan joneno kuom gik moko duto ma notimo e piny Judea, gi Jerusalem. To ne ginege ka giliere e yath. En e ma Nyasaye nochiere chieng’ mar adek, momiye nenore, ok ni ji duto, to ni joneno ma Nyasaye noseiyero, e wan ma nochiero kendo metho kode bang’ kosechier oa kuom jo motho.”

Mariko 16.9

To ka Yesu nosechier gokinyi mang’ich, chieng’ mokwongo bang’ Sabato, nokwongo tucho monenore ni Mariam nyar Magdala, ma nogolo kuome jochiende abiriyo.

Jo Rumi 4.25

En e ma nochiwe mondo otho nikech richowa, kendo nochiere mondo oketwa kare e nyim Nyasaye.

Johana 20.26-28

Bang’ ndalo aboro jopuonjrene ne ni e ot, kendo Thoma ne ni kodgi. Yesu nobiro ka dho udi ochiegi, nochung’ e diergi, mowachochi niya, “Okuweuru.” Eka nowachochi ni Thoma ni, “Kel lith lweti ka, kendo ine luetena; kel lweti, iketi e ng’eta; kendo kik ibed ng’at ma ok yie, to ng’at ma yie.” Thoma nodwoke ni, “Ruo-dha, kendo Nyasacha.”

Johana 5.25 gi 28, 29

“Adier, adier, awachonu ni, ndalo biro, kendo osehopo, ma jo motho nowinj dwond Wuod Nyasaye; kendo jo mowinjo gini-dok mangima. . . Kik uwuor wachni; nikech ndalo biro ma ji du-to manie liete nowinj dwonde, kendo giniwuog oko; jo ma notimo maber nochier e ngima, to jo ma notimo maricho nochier e bura.”

2 Jo Korintho 4.14

Kwang'eyo ni en ma nochiero Ruoth Yesu a kuom jo motho, nochierwa bende gi Yesu, kendo noterwa kaachiel kodu e nyime.

Jo Rumi 6.4,5

Omiyo ka nosebatiswa e thone, noyikwa kode, ni mondo, kaka Kristo nochier a kuom jo motho kuom duong' mar Wuoro, kama-no wan bende wawuothi e ngima manyien. Nikech ka waseriwore kode e thone, wanariwre kode e chierne bende.

Mathayo 16.21

Nyaka a ndalono Yesu nochako nyiso jopuonjrene ni onego odhi Jerusalem, kendo osande gi masiche mang'eny e lwet jodongo, gi jodolo madongo gi jondiko, kendo onege, kendo ochiere chieng' mar adek.

2 Timotheo 2.15

Tim matek mondo ichiwri ka ng'at ma Nyasaye oyiego, kaka jatich ma wiye ok kuodi, kipuonjo kare wachno mar adiera.

Luka 1.74, 75

“Koseresowa e lwet wasikwa, nomiwa mondo watine ma ok waluor, Kwabedo maler kendo makare e nyime ndalo duto.”

2 Jo Korintho 7.1

E momiyo johera, nikech wan gi singruokgo, ber mondo walwo-kre a e chido mar ringruok kendo mar chuny, mondo wabed maler chuth kuom luoro Nyasaye.

1 Petro 1.2

Ma noyier kaka Nyasaye Wuoro nong'eyo chon, kendo ma nopwodhi gi Roho mondo gimak wach Yesu Kristo, kendo mondo rembe okir kuomgi. Ng'wono gi kuwe obednu momedore.

1 Petro 1.15

To kaka Jal ma noluongou oler, un bende beduru maler e timu duto.

2 Timotheo 2.21

Omiyo, ka ng'ato opwodhore oa e yore ma ok ler, enobed kaka agulu mar tich mogen, mowal, ma wuon ot konyorego, agulu moik ni tich mabeyo duto.

Jo Efeso 4.24

**Mi urwak dhano manyien, mo-
chue e kido mar Nyasaye, kendo
ma nyisore e tim makare kendo
maler adier.**

Jo Hibrania 13.12

**E momiyo, Yesu bende nonegi
oko mar dala mondo opwodh o-
ganda gi rembe owuon.**

Isaiah 35.8

**Kendo ndara nobedie kod yo,
mi nochak nyinge ni Yor tim ma-
ler; jo ma ok ler ok nowuothie:
to nobedi mar jogo: jowuoth, ka-
ta jo mofuwo, ok nolal e yorno.**

Mathayo 3.11

**“An to abatisou gi pi kuom loko
chuny; to jagono ma biro bang’a**

**oloya gi teko, ma ok awinjora
ting’o wuochene; en nobatisu gi
Roho Maler kendo gi mach.”**

Jo Efeso 1.4

**Kuom herane noyierowa e Kri-
sto ka piny ne pok ochue, mondo
wabed maler kendo ma onge
mbala e nyime.**

2 Petro 3.11

**Ka gigi duto biro leny nono
kamano, onego ubed jo maler
manadi e ngimau, kuluoro Nya-
saye!**

1 Johana 1.9

**To kwahulo richowa, en jadier,
kendo en makare, omiyo nowe-
nwa richowa, kendo nopwodhwa
kuom tim duto ma ok kare.**

Tich Joote 13.52

Kendo jopuonjre nopong' gi mor kod Roho Maler.

Ezekiel 36.27

Kendo anaket roho mara e chunyu, anamiyu wuotho e chikna, eka unumak buchena, unuritgi.

Luka 11.13

“Ka un jo maricho ung'eyo miyo nyithindu mich mabeyo, Wuoru me polo ok nochiw mokadho Roho Maler ni jo ma kwaye koso?”

Tich Joote 4.31

Ka ne giselemo, ka ma ne gichokoree noyiengni; mi Roho Maler nopong'ogi duto, kendo ne giyalo Wach Nyasaye gi chir.

Tich Joote 1.8

“To unuyud teko ka Roho Maler obiro kuomu; kendo unudok jonenona e Jerusalem, gi Judea duto, gi Samaria, kendo nyaka tung' piny.”

Jo Rumi 8.9

Un to, ringruok ok chiku, to Roho e ma chikou ka Roho mar Nyasaye odak e iu. Ka ng'ato onge gi Roho mar Kristo, ok en ng'ate.

Tich Joote 11.24

Nikech ne en ng'at maber, mopong' gi Roho Maler kendo gi yie. Kendo ji mang'eny nome-dore ni Ruoth.

Mariko 9.23

Yesu noluwone niya, “Ikelo nadi wacho ni, ‘Kinyalo’? Duto nyalore ni ng’a moyie.”

Zaburi 37.3

Gen kuom Jehova, kendo tim maber; Kamano inidag aming’a e piny kendo niyieng’ kiluwo adiera.

Zaburi 34.18

Jehova ochiegini gi jo ma chunyi onyosore chuth, Kendo oreso jogo ma chunyi lokore kuom richogi.

Isaiah 66.2

Ni mar lueta oseloso magi duto; kamano magi duto notimore,

Jehova owacho: to nagen ng’ato machalo kamani, ng’ato ma jachan, malokore kuom richo gi chunye, matetini kawacho.

Fweny 21.4

“Kendo Nyasaye noywe pi wang’ duto e wengegi; tho ok nobedie kendo, kata ywak, kata nduru, kata rem ok nobedie, nikech gik machon osekadho.”

1 Petro 4.12, 13

Joherana, kik uwuor temruok mar mach ma bironu mondo otemu, ni gimoro malich timorenu; to moruru kaka jo moriwore gi Kristo e masiche, mondo ubed kod mor gi ilo ka duong’ne noel.

1 Jo Korintho 10.13

Onge temruok ma osenwang'ou ma ok mano ma yudo dhano. To Nyasaye en Jadier, kendo ok no-yie mondo otemu moloyo tekreu; to e temruokno nomiugo bende yo mar wuok, mondo unyal dhi-lie.

Zaburi 34.19

Weche ma sando ng'at matir ng'eny; To Jehova ogole kuomgi duto.

Jo Rumi 8.28

Kendo wang'eyo ni gik moko duto tiyo kaachiel ni jo ma ohero Nyasaye, e jogo moluong kaka Nyasaye ne dwaro.

Isaiah 43.2

Ka ikadho e pi, nabed kodi; kata e aore, ok gininyimi: kiwuotho e dier mach, ok nowang'i; kendo ligek mach ok nomok kuomi.

2 Jo Korintho 4.17

Nikech masichwa matin, ma kadho piyo, losonwa duong' mo-chwere modhiero poro.

Jo Hibrania 2.18

En owuon osekadho e tem mar neno masira, omiyo onyalo konyo jogo mitemo.

Jo Rumi 16.20

Kendo Nyasach kuwe nomiu nyono Satan e tiendu piyopiyo.

Fweny 3.21

To ng'at molocho anamiye bet koda e kom duong'na, kaka an bende nalocho, kendo abet kod Wuora e kom duong'ne.

Fweny 3.5

Ng'at molocho norwakre kama-no gi law marachar, kendo ok anaruch nyinge ngang' e kitap ngima; kendo anahul nyinge e nyim Wuora, kendo e nyim malaika mage.

Fweny 3.12

To ng'at molocho, anatime siro e Hekalu mar Nyasacha, mi ok nowuog oko kendo ngang'; kendo nandik kuome nying Nyasacha,

kod nying dalane, ma en Jerusalema manyienno, ma lor piny koa e polo kuom Nyasacha, kendo nandik kuome nyinga manyien.

Fweny 2.7

Ng'at man gi it, mondo owinji gi ma Roho wacho ni kanise. Ng'at molocho anamiye chamo o- lemb yadh ngima, manie Puoth Nyasaye.

Fweny 2.26

To ng'at molocho, kendo morito tichna nyaka giko, anamiye teko mondo olo ogendini, kaka an bende nanwang'o teko kuom Wuora.

46 NYASAYE LOSO KODWA KUOM KETHO KEND

1 Jo Korintho 7.39

Chik otueyo dhako ndalo duto ma chwore ngima; to ka chwore otho, ogonye mondo ng'a modwaro okende; to mana kuom Ruoth.

Mathayo 5.32

“An to awachonu ni, ng'ato ka ng'ato ma riembo chiege, mak mana ka chiege oseterore, omiye terore; kendo ng'at ma nokend jalno moseriembi, oterore.”

Jo Rumi 7.2, 3

Kaka dhako man gi chwore chik otueye kuom chwore ka pod chwore ngima; to ka chwore otho, ogonye kuom chik chwore. Ka chwore pod ngima, to obedo kod

ng'at machielo, iluonge ni dhako ma terore; to ka chwore otho, ogonye kuom chikno, omiyo ok en dhako ma terore ka dichwo machielo okende.

1 Jo Korintho 7.10, 11

To kuom jo mosekendo, gi jo mosekendi, ok an, to Ruoth e mochiko ni, dhako kik owe chwore; to koweye onego osik ma ok okende, kata mondo odog owinjre gi chwore; kendo dichwo kik owe chiege.

Luka 16.18

“Ng'ato ka ng'ato ma riembo chiege mi okendo machielo, oterore; kendo ng'at ma kawo dhako ma chwore oseriembo, oterore.”

Johana 14.3

“To ka adhi malosonu kar bet, anabi kendo, eka narwaku ka ma antie; mondo ka ma antie an, un bende ubedie.”

Fweny 3.11

“Abiro piyo; mak matek gino ma in godo, mondo kik ng’ato okaw osimboni.”

Mathayo 24.30

“Eka ranyis mar Wuod dhano nonere e polo; dhoudi duto mag piny noywagre, kendo ginine Wuod dhano ka biro e wi boche polo kod teko gi duong’ maler mang’ongo.”

Jakobo 5.8

Un bende, horeuru mos; teguru chunyu nikech biro mar Ruoth chiegni.

Mathayo 24.27

“Nikech kaka mil polo wuok e yor wuok chieng’ monenore nya-ka imbo, e kaka biro mar Wuod dhano nobedi.”

Mariko 8.38

“Nimar ng’ato ma wiye okuodi koda, kendo kod wechena e tie-ng’ni ma terore kendo makethore, Wuod dhano bende wiye nokuodi kod ng’atno, ka nobi e duong’ maler mar Wuon mare kaachiel gi malaika maler.”

Fweny 16.15

Neuru! Abiro ka jakuo. Ng'atno en ng'a moguedhi ma neno, kendo ma rito lepe maber mondo kik owuoth duk, kendo one wich kuot.

Luka 12.40

“Un bende, ikreuru, nikech sa ma ok upar e ma Wuod dhano biroe.”

1 Johana 3.2

Johera, wan nyithind Nyasaye koroni, to pok ofwenyore kaka wabiro bet. Wang'eyo ni, ka no-fwenyre, wanabed ma chalo kode, nikech wananene kaka obet.

Mathayo 16.27

“Nimar Wuod dhano nobi e duong' maler mar Wuon mare kaachiel kod malaikane, eka nomi ng'ato ka ng'ato kaka timne obet.”

Luka 21.27

“Eka ginine Wuod dhano ka biro e boche polo gi teko gi duong' mang'ongo.”

Tich Joote 1.11

Mowachonigi niya, “Un jo Galili, uchung' ung'iyu polo nang'o? Yesuni, moter malo e polo koa kuomu, noduogi mana kaka use-nene kodhi e polo.”

WACH NYASAYE

Wachni e taya mar tienda, Giler mar yora. — Zaburi 119.105

Asekano wachni e chunya, Ni mondo kik aketh e nyimi.

— Zaburi 119.11

Yesu nodwokogi niya, Ubayo yo, nikech ok ung eyo weche manie Ndiko, kata teko mar Nyasaye. — Mathayo 22.29

Ndiko duto mowuok kuom much Nyasaye, konyo kuom puonjo ji, kuom kwero gik maricho, kuom rieyo ji, kendo kuom tiego ji mondo gibed jo makare. — 2 Timotheo 3.16

Kik umed gimoro ni wach ma achikou, bende kik ugol gimoro, ni mondo umak chik mag Jehova Nyasachu machikou.

— Rapar mar Chik 4.2

Polo gi piny forum; to weche-na ok norum ngang .

— Luka 21.33

Nikech wach mokor ne ok obiro kuom dwaro mar dhano ngang , to ji ne wacho wach moa kuom Nyasaye, kaka Roho Maller ne telonigi. — 2 Petro 1.21

Wachni ogurore e polo, A Jehova, Chieng ma nyaka chieng .

— Zaburi 119.89

Published in numerous languages by World Missionary Press, Inc.,
as God supplies funds in answer to prayer. **For questions or more
information by country, visit: www.wmp-contacts.org**

World Missionary Press
PO Box 120
New Paris, IN 46553-0120 USA
www.wmpress.org



Read booklets online or by App
www.wmp-readonline.org
48 Luo HFA